

Lider di fraccion di AVP ta urgi Minister Presidente

Kita BBO awor y bin cu fondo di emergencia

Polis a pidi AVP acerca Gobierno pa situacion alarmante

ORANJESTAD(AAN)— Promer cu 2007 a termina, e lider di fraccion di AVP Mike Eman a manda un carta pa Ministro Presidente Nelson Oduber den cual e ta urgi e gobernante pa tuma un serie di medida. E ta transmiti tambe e preocupacion di sindicato di Polis manera a worde pidi na AVP. Mr. Mike Eman ta pidi e Ministro Presidente pa kita BBO awor, introduci un fondo di emergencia. E ta haci un yamamento riba Ministro Presidente Oduber pa haci uso di e cifranan di AVP pa por deshaci di BBO y problemanan actual.

Den su carta Mr. Mike Eman ta bisa Ministro Presidente Nelson Oduber cu dia Promer di Januari 2007 gobierno Oduber a introduci un impuesto nobo bao di e nombre BBO. Tur conseho tabata negativo pa loke ta trata e efectonan inflatorio cu e belasting acumulativo aki a causa. Sin embargo gobierno a insisti y den un proceso cuestionabel a forza e pasamento di e Ley di BBO den Parlamento. E lider di AVP ta muestra cu e efectonan social economico di BBO hunto cu otro medianan cu Bo gobierno a bin ta tumando, ta causando un crisis social di empobrecimiento penoso den

nos pais. Tanto comercio como pueblo ta sufriendo enormemente bao di e efectonan di BBO cu a kibra e forza di compra na Aruba cu un inflacion record y feroz.

E crisis social cu BBO ta causando tin tambe efectonan sumamente negativo riba e bida social na Aruba. Famianan ta biba bao di un presion cu ta kibrando e nucleo familiar.

E efectonan ta asina dramático cu por mira consecuencia hopi grave y preocupante riba hobennan, manera e carta di Eman ta sigui bisa. E ta papia di desesperacion, falta di perspectiva y estabilidad den nan ambiente. E efectonan di BBO ta kibra lazonan social y e maneho di Gobierno ta causando casonan hopi penoso y lamentable den comunidad.

Den un reunion cu Sindicato di Polis di Aruba (SPA) un

peticion a worde haci riba fraccion di AVP pa urgi Gobierno pa dedica atencion na e situacion preocupante di criminalidad y violencia den comunidad y e presion cu esaki ta causa riba e trabao di polis pa garantiza seguridad y tranquilidad.

Mr. Mike Eman ta muestra cu ta obvio cu e maneho di gobierno ta causando un crisis social economico sin precedente.

Na number di fraccion di AVP, representando un parti grandi di nos pais, e ta urgi gobierno pa inmediatamente tuma e siguiente accionnan di emergencia. Inicia e proceso pa revoca e medida di BBO; E presupuesto

alternativa y e amienda di fraccion di AVP ta muestra na un forma cla con esaki ta posibel.

Ademas Eman ta bisa Gobierno cu mester introduci un fondo di emergencia pa asistencia social pa esnan

mas vulnerabel den comunidad.

Mr. Mike Eman ta bisa Gobierno cu den e presupuesto alternativo y e amienda di fraccion di AVP tin un estructura mas husto pa onderstand y bijsand cu ta inclui un aumento di 50% di onderstand y bijsand y introduccion adicional di un schoolkinderentoeslag pa muchanan den famianan di menos recurso.

Mester institui un fondo di emergencia pa Cuerpo Policial por tin un presencia mas grandi den comunidad pa evita casonan cu mañan Aruba ta lamenta. Fraccion di AVP a presenta tambe iniciativa di ley pa duna Cuerpo Policial mas

autoridad pa por preveni mihor criminalidad door di mantene seguridad y tranquilidad na Aruba.

Fraccion di AVP ta propone pa e pasonan aki worde inclui den "Notanan van Wijziging" riba e presupuestonan di Ministerio di Asuntonan Social y Asuntonan General cu ainda mester worde trata den Parlamento. "Un falta di Bo gobierno pa atende cu e emergencianan aki lo constitui un negligencia grave adicional di Bo responsabilidad y di Bo coleganan pa cu e interes general di Aruba y e Bienestar General di nos pueblo," Eman ta splica Oduber.

TELEFONNAN DI DIARIO
582-6747- FAX 582-8551

2007 LO BIRA JALOERS RIBA 2008!!

TECLA, E AÑA AKI MI TA EXIGI PA CADA PARTICIPANTE DI CALYPSO CONTEST CANTA 2 SECONDE SO, SINO MI NO TA HABRI CARNAVAL 2008!!

AWEL NEL, NOS LO BAI TIN UN PROBLEMA HOPÍ SERIO E AÑA AKI!! CLAUDIUS SU CALYPSO SO TA 30RA Y ASINA MES LABANDO 90% AFO!!!



To's4u
Wilhelminastraat 81 • Tel: 582-2297
Sta. Helena (Happy Mall) • Tel: 588-4501

